



Ворҕа хатлэв ванамад

Ялап йиты лапатан, ун кер тыдась лапатмет хатадан, ханты хоятат Ворҕа хатлэд постаты питлат. Ай куртатан улты ханты ёх унта порыдыты яңхлат. Вошаң хоятат сютсаты хатлатан емаң хатла давалдайт.

Хасям талатан аршак вошаң ханты хоят, колледжатан уталтыты энамты ёх Ворҕа хатла ёхтыдыты питас. Садика яңхты няврэмат кеша емаң хатлат вердайт. Пулңават вошан щуциет пилан рупитты ханты нэңат «Сорнең худые» нэмпи садикан каман ар хорпи хар дарпитлат.

Там пуш Пулңават воша ёхтыдыты хоятат па вошаң ёх Канась Пухла, Лапатнаңк вош «Саран курта», «Геолог» хар хося сютсаты хатлатан емаң хатла ёхатты верытлат. Си харатан Ворҕа имева постама вантопса эталтыла,

касапсайт манлат, тынасты харат дарпитдайт. Вератты харатан няврэмат па ун хоятат вошлах, нэпек па щашкан элты ворҕа хор верлат.

Ворҕа имев давалман, ханты хоятат хорам сохлад луматман па ермак охшамдал ярман, няврэмдал, рутлад па хоттэл хоятлад пилан Валентина Михневич «Мув тай» вулы хотан давалдайт. Мойң хоятат вулы хорты тахайн ох понман, сумат юха щашкан па калац кар ярамты верытлат. Вулы хотан вулы нёхи па хул, порылдым лэгот лавемиты, шай йинсыты. Няврэмием каман ёнтты па касты харан лэсятдайт.

Ханты хоятат, ун емаң хатла ёхтыдыты, порыдыты. Тумтак ёш, тумтак кур! Ойңа-пищана, йисаңа-нуптаңа!

Альбина Тырлина ханшам потар

Хор: Зоя Куртямова



Няврэмат щутщаты хара ханшлдатты порая йис

Луң сис рупитты аңкет-ащет няврэмел утца ёдан ант хайты ураңан, кашң пуш нумаслат холта лувел туты. Щи кеша кашң вошан па куртан улты ашкудаятан щутщаты харат дарпитдайт.

Номас понтса там пуш лапат щёрас молтас няврэм ёнтлдатты па яммалтаты. Округев хуват луң сис нийдъяң педа худам ашкудайн щутщаты хар лэщатла. Мет ар Ноябрьск, Лапатнаңк вошатан па Пуировской районан.

Ун кер тылац яңмет хатл элты няврэмат щутщаты хара ханшлдатты рахты

питал. Заявка онлайн щиран «Госуслуги» хуват китты, МФЦ ад па пирийм ашкудая яңхты па щита заявление нэпек ханшты.

Няврэмат кеша ветъяң молтас смена лэщатса, хота эвет-похат касты, якты, арыты, верантты, хор ханшты питлат. Хон мув хуват манты «Движение первых» па «Орлята России» проектнан тохи пилтацман, ищи рупитты питлаңан.

Кашң щутщаты хар тут пайттыин сый туты пормасатан, лэвас хоят лыпия ант лоңты ураңан пушасатан лэщатман улдат. Хатл сис ашкудайн леккар рупитал, ов хар давалты хоят иса омасал, нёхты хор ханшты пормасат па тайдат.

Худам сменаин ветсот уталтаты хоят рупитты питал, няврэмат ёнтлдатты па ун хоятата нётты айлат ёх рупатая вулдайт.

Тунаял тамац щутщаты харатан кат щёрас молтас няврэм щутщас.

Пенсия ох еша элатла

Ун кер тылац олаңмет хатл элты пенсия ох элатты вер 14,75% арата йил. Хацтам тал хуват тылац улты ох вантла па пенсия ох тарамты унты элатла.

Округеван улты катхоцъяң щёрас молтас хоят еша энмам пенсия ох ун кер тылацан ёша вулат. Кашң хоят лув вуты хатладан пенсияйл ёхатад.

Социальной пенсия вуты хоятата пирац икет па нэңат тумпийн, мушаң хоятат, анти муй па ащи ант тайты няврэмат, Волаң Лялян улам хоятат, «Житель блокадного Ленинграда», «Житель осаждённого Севастополя», «Житель осаждённого Сталинграда» мевал пос тайты хоятат, там йисан лялятан мушмалтам ёх ищи тохи луңтаслат.

2025-мет талдан ант рупитты хоятата тылац улты ох 20 893 солкувая хойс. Пенсияйн улты ант рупитты хоятат, хоятат ёша вуты пенсияел тылац улты ох элты шимла этал, холна региональной доплата сохпатты вер ул.

Хой хоятат пенсия ох элты молты иншасапса тайлат ки, там номер хуват 8-800-100-00-01 потарты верытлат. Улты куртладан-вошладан «Социальной Фонд России по ЯНАО» хоят пилан рупитты хота яңхты па щита лэрапты.



Хор: ЯНАО губернатор пресс-служба

Ёмвошан дохан хатэмисат



Полина Плюснина Ямал мув команда лүңтасал.

Хасям лапатан Ёмвош округан дохан хатэмиты па пошкан элты орытты Хон мув чемпионат манас. Россия мув суңат па Белоруссия мув элты ёхтылым 185 хоят няд хорпи касты ятан юрацсат.



Ямал мув команда.

Хор: Альбина Търлина

Там талдан хон мув касапсайт етшаты унты, касты хоятат холна Ёмвош юпийн Мурманск вошан уйтантылат. Си юпийн, туп ялап талдан манты касапсайта дэсатыты пилтат.

Шоши мув касты хоятлув кашц порайн дохан хатэмиты па пошкан элты орытты хон мув касапсайта яңхлат. Ёмвошан, там манты уйтантопсайн Полина Плюснина спринт хухатдымалан, олаң

тахая этас, сорнең пос шитас. Кимет хаталан муң нэңиев гонка преследование хося хулмет тахая этас, патарох мевал пос шитас. Ёх хоятлув си касапсайтан нэмомлты тахая ант этсат.

Ма сита Полина Плюснина пилан уйтантысам па потрэмисам. Лув каматса ясаң ястас: «Ма 2024-мет талдан дохан хатэмиты па пошкан элты орытты Ямал мув команда муңев дэсатыты хоятэван Максим Максимован вохсайм. Ма Мордовия мув элты ёхатсам. Асем – Виктор Анатольевич Плюснин, тренера уд. Добрянской ДЮСШ няврэмат пилан рупитал. Лув манэм па апсем дохан хухатдыты уталтасды.

Яң тал элты дохан хухатдыты па пошкан элты орытты пилтасам. Хон мув команда нийлхус талдан вусайм. Нэңат сборная кат тал лүңтаслам. Па мир касапсайта ант яңхилдысам. Там талдан ма хон мув ар вошатан кассам. Олаң, кимет, хулмет тахаята этлдысам. Там касапсайн олаң па хулмет места усам.

Манэма шеңк умась округ командын рупитты. Шеңк аматсам, хун тохи вусайм. Округ касты хоятлув хол па регионат элты ёхатман улдат. Юниорской командын иса Ямал муван улты няврэмат каслат».

Альбина Търлина ханшам потар

Рупата щирн вещьката улты мосал

Хащам лапатан округ губернаторэв лаңкар кущайдал па улапса верат элты вантман па шавиман тайты хоятат пилан уйтантопса верас. Округ вошаң па куртаң утхотатан рупитты ёх нёхты хор альты хошап хуват лув пилдэлан потартсат, хулантсат па вантсат.

Вулэт, мисат, доват тайты, муван картошка па торн дэготат энмалты вер, хул-вой велдаслаты рупата туңащира туты па щир вер педа эслам охат лэваса ант посатты ураңан потар манас.

Улапса верат элты вантман па шавиман тайты куща ёх потар катадсат, хоты 2024-мет талдан рупатаед манас. Муй щиран анта вер сахат посатты охат ёхлы кератсат.

Тамхатл кеша хулат-войт па муван дэготат энмалты рупатайт туты департамент ветхощяң ят хуват рупитал. Там рупатайдал тутыя, хуламхощяң касапса вер туңял манас, щилта 2,9 миллиард солдувайн масайт.

«Там йисан верты рупатаев информативной система АПК хуват

манал. Вер яха туты хоятата щилта яма ныла, муй утхот нэпекат холта китсайт па муй арат ох щир вера сохаптаса.

Ох эсалты федеральной казначейство Управление, охат луңатты ЯНАО Счётной палата, прокуратура, следственной комитет па МВД дэрапты хоятат там система хуват вантты верытлат, муй щирн рупата верман ус», – хулат-войт па муван дэготат энмалты рупатайт туты ЯНАО департамент куща ху Андрей Рубашин ястас.

Округ кущаев уйтантопса тувмал порайн ястас: «Шоши мувеван арсыр верат манлат. Кашц вер хоща шеңк ун охат понман улдат. Рупатаев вещькат верман, халэват хатлэв педа елды нумасты мосал, турм ураңан мийм охат пилан ошаңа рупитты. Хоятат улапсаел, верты вердал шавиман па вантман тайты ёх иса дэрапман ат рупитлат. Муй щиран рупатаев верлув, щиты улдув. Там мувеван улман, йи номас тайман, яха пилтащман йи вер верлув».

Зоя Куртямова ханшам потар

ОБЪЯВЛЕНИЕ

**СЛУЖБА
ПО КОНТРАКТУ
В ВС РФ**

ПОЛНАЯ ИНФОРМАЦИЯ ПО ТЕЛЕФОНУ

8(902)81-6-11-90

ЗВОНОК ПО РОССИИ БЕСПЛАТНО

**ВРЕМЯ ДЛЯ
ВАЖНЫХ РЕШЕНИЙ!**

КОНТРАКТНАЯ СЛУЖБА

6 200 000 Р

ЕДИНОВРЕМЕННАЯ ВЫПЛАТА

3 500 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживание в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 100 000 Р

ЕДИНОВРЕМЕННО ОТ РЕГИОНА

ДО 120 000 Р

СЕРТИФИКАТ НА РЕАБИЛИТАЦИЮ

400 000 Р

МИНИСТЕРСТВО ОБОРОНЫ

ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

**ЕЖЕМЕСЯЧНЫЕ ВЫПЛАТЫ
ПРИ НАХОЖДЕНИИ В ЗОНЕ СВО**

**РЯДОВОЙ
ОТ 210 Т.Р**

**СЕРЖАНТ
ОТ 232 Т.Р**

**ПРАПОРЩИК
ОТ 292 Т.Р**

Аңкия йиты нэңат мойлапсайн маты питдайт



2024-мет талан «Вещкат юш» манам порайн, Губкинской вошан улты нэ Любовь Петроваджи округ куцаева вохапса пойк верас, па щирн улты нэңат леккар хота олтыйн, мойлапса щиран, олаң сыс мосты пормасатан маты.

Щи пойк ясаңл нумман, округ куцаев лаңкар куцайдала партапса верас, нэңат элты инщасты, мойлапса даращ дышел муйң тэкаптаты.

Там ванан губернатор лаңкар куца нэ Ирина Новосёлова, хоятата нэтапса верат туңмалты департаментан рупитты хоятат, леккар куцайт, ар няврэм энмалты аңкиет, па щирн улты па леккар хотан олты нэңат яха уйтантысат па мойлапса вер элты потрэмисат.

Мет олңа нэңата альса, олаң сыс актаң «Ямал мув аңкия» мойлапса дараща муй понтса: венш мухты кат сох, леккар хотан думатты ернас, кура думатты щашкан вайңан, лёхитыты па венш сыстаптаты пормасат куншап пидан атэң ай хирсохийн тохи акатман усат.



«Мойлапса дараща понты пормасат»

Уйтантопсайн улам кашң нэ ястаты верытас, муй пормас лэщалаң, муй па ант мосал тохи понты.

«Мойлапса дараща понам пормасат вантмев юпийн, ма пидэман леккар хотан олты нэңат, кур ёвартты ураңан таласты бинт тохи понты вохсат. Мисыйиңк каврама тайты кеван, рещина соскайң кат кевана пелатты партсэл. Вантсэв, муй щашкан элты ернас ёнтман ул, щит па пирисув. Даращ тэкаптаты вер

ходна ант етшас, ходна па муйн понда, щит элты потар елды тула. Там шеңк ям вер. Тухал нэңат ай куртат па вуды хотат элты леккар хота тулайт. Хойтат шаңкап актащман, кум ант щитлат мосты пормас патан вуты. Мойлапсайн матыйн, кашң хоят аматаң. Номас хоща ищи ям», – леккар хотан олам нэ Любовь Атаман ястас.

Партапса патэң унты туңмалты юпийн, куцайлув номас понтсат, няврэм давалты нэңата сус элты мойлапса питцаты маты. Аңки леккар хота ёхаттыйн, «Ямальной маме» мойлапса даращан мада, леккар хот элты ёхи мантыйн, ведщи сэма питам няврэмал ураңан «Малышу Ямала» мойлапса даращан катлаптада.

Тунаяд элты «Ямал – территория детства» ун нэтапса вер туты программа рупитты питас. Няврэм сэма питты хатдал элты уна йитал унты, хоттэл тыйты пора элты няврэм давалты унты там программа хуват леккар, уталтаты, касты па каш лэщатты, нэтапса вер туңмалты па айлат ёх пидан рупата туты хоятат яха пидтащман рупатаел тулэл. Национальной проект «Хоттэл» хуват там верат елды мандат.

Округ куца нэмпии стипендия щитсат



Хор: Зоя Куртямова

Рупата пела уталтыты катсот молтас эви па пох хащам тал шуп округ куца нэмпии стипендия вуты питлат. Щи кеша, олаң тал шуп яма уталтыты па тал сессия экзаменат «4», «5» поса етшаптаты мосас.

Губернатор нэмпии щитты охат яма уталтыты, научной рупатайт верты, касты па каш верты харатан олңа этты няврэмата мада. Пирыйм эвет-похат тал шуп кашң тыдащ яң щёрас солкувайн сохаптадайт.

Ох щитам ёх кутан сот молтас няврэм Овс мув щимлаң мир хоятата луңтаслат. Хольмаң пела вет няврэм, хойтат ащидал СВО харатан улдат, ищи щимащ стипендия вуты питлат.

Там пуш мет ар заявка нэпек округ колледжатаң, Тюменской область па Хон Петра вош институтатан уталтыты эвет-похат китсат.

Губернатор нэм тайты стипендия 2020-мет тал элты сохаптаты питса. Хащам тал сыс щёрас молтас айлат ёх тамащ ох ёша пайтас.

Питдор куртаң юраң пох

Там ванан Сыктывкар вошан даварт карты шуп адамман Хон мув касапса манас. Щита Дорвош район элты, Питдор куртан улты па ашкудайн уталтыты ханты похие Кирилл Хартаганов па ус.

Кирилл ветъяң молтас кила талты хоятат кутан касас. Карты шупал худам пуш адамман, давартал нялсот пела нийлъяң вет кидая хойс па худмет местая этас.

Касапса пириты хоятат ястам щиран, там похев тунаяд элты юраңашак йис.

Мохты ныла, хоты лув рупитас. Хащам тал манам касапсайн лув хутмет ус.

Даварт адамты юраң ёхлал кутан муң ханты похиев ловатадан мет ай. Там талдалан, урайл нох пайтман рупитмал ураңан, мастер спорта кандидат нэм лувел щитас.

Талта елды, касты ханты похиев мет юраңа ат йил. Адамты даварт карты шуплал пун иты кенат ат улдат. Тумтака уда, наңен шавиман таи.



Хор: vk.com/popovolegshur



Улапсайл хуват арсыр верат вантас...

Щиты ма щазем Евдокия Степановна Шульгина (Тарасова) элты ястадам. Лув ай кер тыдащ 14-мет хатадан 1915-мет талн Асов курт куца ху Степан Алексеевич Тарасов (1871-1943-мет талатн ус) па Наталья Фокична (эви опрацнэмл Контерова, 1885-1969-мет талатн ус) хотн сэма питас. Йис потар элты уйтдам, хунты ун йиңк порайн ханты ху Тарас Тарасов там пухра шошмацтас, щит кат Ай па Ун Ас кутн улты посл хоца ул, щиты айлтыена Асов курт тыйс. Тарасов опрацнэмл, алпа, тарам Ас ясаңан элты тыйс.

Щазем ун эвия ус, лув юпелн Егор, Филипп, Никита па Семён апщилал сэма питсат. Ай эвие Куншавт курта тутдыса, щита Турам хотн руц перна посл понтса па Евдокия нэмн ханшса. Там нэм ханты ясаңа толмацтаты ки, щит хатнэху педа самаң нэ, па щазем щимац хатнэхоята ус. Лув муң ун щемьяевн Най хорпи имия ус.



Айтэлн аньтеледа-ащеда апщилал энмалты, хот войт тайты па ащеда худ велпаслаты нэсас. Аньтел элты иса мосты верат элты оша верас – улапсайл хуват туса ёнтасас, хорамаңа арыйс.

Щазем ванкутды потартас, хунты Асов куртан руц тынасты ху Новицкой ус, лув хантэт элты худ, нёхи, вой сохат лутас, щитат Топол воша тутдыйс, ёхды велпас пормасат, дэготат па иса мосты отат тус.

Дуня эвие ай порайн аньтел пилн хопн муй довн Куншавт

курт унты почта тутдыйс. Щи порайн щит ун курт ус, щита куца хот, лапка, нянь верты хот, ай леккар хот, худ велпаслаты таха па па тахайт усат.

Евдокия уна ювмалн вантас, муй щирн муң Овс мувевн советской лац омасса. Асов куртэвн и хатадан Вурты армия солтанат, па хатадан Нови армия солтанат усат, щит элты куртаң мира палтап улты ус. Советской лац омасса, мет шопаң хантэта йис улапсаел элты ялап улапса ялаварт керлаты ус. Айлтыена ялап щирн улты щи питсат. Щалта тацаң хантэт па шепан икет нартамды-щаврамты питсайт – ищи лаварт вантты ус.

Дуся-эвие ашкудайн ант уталтыяс, туп апщилала нэпекаңа йиты партас. Егор апщел вет тал доватан антома йис. Филипп па Никита Асоваң ашкуда етшаптасқан, елды Пулңават вошн уталтысқан, Филипп – тынасты вера, Никита – вой яммалты вера. Щалта ляля мантсаңан. Никита Сталинград вош пуңалн антома йис, Филипп Берлин вош унты лялясас, дыдңа керлас. Имел пилн яң няврэм тайс.

Евдокия ай пора вуш элты рупитты олңитас. 1931-мет талн Асов куртан артель ус, 1936-мет талн «Ялап юш» колхоз тыйс. Лув щита картопка, арсыр овоцат опсас, торн сэврас, нопталтас.

Щи талн лув худ велпаслаты хоят Константин Алексеевич Шульгин (1905-1946-мет талатн ус) сая манас. Икел пилн лув рут Послово куртэда каслас, щита дын «Коминтерн» колхоз хоца рупитсаңан. Ляль



Хор: Людмила Шульгина

порайн икел юх сэварты тахайн куца ус. Щемьяел пилн Куцта куртан усат. Айлтыена дыв щемьяелн няврEMAT: Егор, Евдокия, Марфа, Ефим сэма питсат. Евдокия ун эвел иса аньтеледа нэсас, ляль порайн люм воншамот сораптас, елды щитат лант пилн руватсат. Лаварт пора ус. Ведам худ иса ляля китса. Щи порайн Евдокия Степановна Шульгина арсыр рупатайт верас. Нумалмасды: «Ма юх сэварты ёх ураңан нянь версам. Атл-хатл рупитсам, вева йисам. И пуш нянь версам па ил войпсайм. Сэмңалам пуншсам – нянем антом. Щит, нэш, касна хот элты хонтам ёхн долапсайт». Щи тумпийн щазем Ай Ас хоца нови тут

вуцитас, имет пилн нопталтас, юх па торн сэврас.

1946-мет талн икел антома йис, щи тал Тихон похие сэма питас. Лув урнеда лаварт пора йис – атэлт няврEMAT энмалты па рупитты мосас.

Юхатшак Алексей Семёнович Шульгин (1926-мет талн сэма питас) хоца манас. Лув худ велпаслаты ям хоята ус. Дын хоцайн Николай, Мария, Екатерина па Елена няврEMAT сэма питсат. Ун щемьяйн няврEMAT лухсаңа усат. Дыв доват, мис, опат па па хот войт тайсат, няврEMAT айтэлдн аньтия-ация нэсат. Евдокия Степановна па Алексей Семёнович Шульгинңан – Асов куртаң колхозн па худ велпаслаты тахайн ям рупатнекқан усқан, иса порайн план тэчноптасқан.

Ляль порайн па ляль юпийн яма па вецката рупитман ураңан дын арсыр ишакты нэпекат, Волаң Победа хатл постап порайн мевд посатан масайт.

Щазем 1996-мет талн антома йис, муң веккеша лувел нумман тайлэв.

А.С. Шульгин – худ велпасдам ям хоята ус, щирн «Лорвош район Почётной хатнэху» нэм тайс. Лув 2003-мет талн хув паната шушмас.

Лув худ велты верд Николай похл (1949-2015-мет талатн ус) па интам унты Станислав па Игорь хилдэнадал тулңан.

Людмила Шульгина
ханшам потар



Волаң Ляль пора НОММАН

Там нявремат анта йидап йиты тал емаң хатл лайдсат, анта сэмна питам емаң хатл лайдсат. Лув Волаң Ляль етсаты хатл лайдсат. Вул пелак нэңхэт олты «Мядико» хатна «Ляль нявремат сэмна» рубрика олам порайна, Валентина Гуцина номлатсалды, хоты ляль порайна энмас.

80 ПОБЕДА!



Хор: ГБУ ЯНАО «Мядико»

«Ма Волаң Ляль пинтшам порайна холна сэңк ай осам, нил талам ос, топ ма ищипа пци порайт эвалт мала аса номлам. Номлэм, хоты ащем ляльна манас, ма номсамна хоты ма хонт оцсам, мала – щит ляль, топ оцсам, щит мала кепа сэңк атам ат. Ащем юпина вул яйм манас.

Муң па, ма, амэм па холна йи яйм – Омской область Любинской район Голубковской район совхозна хыщсу. Щиты олтэв эвалт ащем хоца щамалты нэпек ёхтас. Муңев олта сэңк щёкат ос. Мули ай хатыйина осу, щита иёлты ищки ос. Холна ма сэңк ямас нэмлэм хоты ма ивейна дыта дытсам. Амэмна хоты щикус лапатта лолан дытсайм, топ дыгыт антам. Сусн нянь пам акатсу, товына патам картошка пулат хырсу. Щимац хатлат олсисат, хонты ропатайл эвалт комбикорм тотлияс, щилта лув кисель кавартас, ма омщаламан енщсам.

Сэңк ямас номлэм хоты ляль етсас. Щи хатл ма сэңк лаялсэм. Йи хатл, ма ищни хоцаңна амассам, товы мув хорас пела вантсам. Вантлэм, нэңхэт васхули хуват холац кепа пци нёхамлат, вул нэңхэт па нявремат. Амэм элты лавсам, нэңхэт холац кепа пци нёхамлат, амэм ищни ким этас... ма па лув юпелна. Сапэк тэлна ант соматмеман, нясах курты... амэм, ма ялта. Нёхамламан, отца ант оцдам холац. Хонты аса совхоз хоцаңна ёхатсат, амэм инщиссалды, мала хоты йис, пци порайна нэңхэт лавсат, ляль етсас. Аса аматсат, халладат, ма па лув пилыдална. Ма олапсэмна, щит мет ям хатл ос!» – Валентина Гуцина лавас.

Мув сайлаты нэңху

Нэңхэт хоца щимац ропата ол – Мув сайдата. Карра тэлна муң солтанлу мувед сайдасат, итта, па пци щимац пора ёхтас. Там тал Хон мувна «Мув сайлаты нэңхэт Талды» постаман ол, щитна нявремат ораңна ашколайтна «Апраң нэңхэт пилна уйтантыты хатлат» вердайт.

Хыщам лапат Зелёный Яр ашкода нявремат СВО эвалт щутцата ёхтам младший сержант Александр Кали пилна уйтантысат. Ляль харна «Север» нэмна понман ол. «Движение первых» алаң отделение хоца лайты нявремат элты Александр лавалсалды, хоты лув служитты тахайлна ол, мала хорпи ропата верл. Итта лялеста мет щёкат, там йисна каман рот беспилотной пордыты аппаратат, квадрокоптерат, октокоптерат олллат, лув щимац пормасат юватлийд. Нявремат элты стрелок-зенитчик-военнослужащий ропата пушци лавалтас.

«Там йисна лялесты нэңхэт кутна мет такан стрелок-зенитчикат маслат, пордыман яңхты пормас ар олтал ораңна. Муң лувилал мала эвалт аса юватлилду. Ма щимац порайна ликмилдысам, хонты номасты ораңна йи минута топ тайлан, пци онтасна ма па ма лялесты пилдам дылаңни хыщсу», – Александр Кали лавас.



Хор: МБОУ «Школа п. Зелёный Яр»

Александр Витальевич заслугайдал ораңна Орден Святого Георгия IV степень, «За воинскую доблесть II степень» па «Отважный» мевал посна майласа.

Зелёный Яр ашкодайна онтыды нявремат ораңна там уйтантопса сэңк самна лоңас. Александр веритсалды этгада, мала хорпи нэңхэт мув сайдалат – ёраңат, палтапцэт, щимац нэңхэт пела вантман, рахал лавта, муң мувув ям ясна ол.

Кадаңаң нэңхэт емаң хатл нявремат ораңна

Охсар похал ашкода-интернат нявремат ораңна ай кер тылац 30-мет хатлна «День юного оленевода» емаң хатл манас. Щита Степнянской ашкода Волновахской район ДНР, Волноваха ДНР па Белгородской область эвалт нявремат тотлисайт. Щимац емаң хатл лув орцидална касаң тал верла, пци онтасна нявремат вул нэңхэт иты ёрдал арталата веритлат, ёхтам нявремат па вантта хоты муң нявремду олллат.

Энамты ях нявремат кутдална кассат: охал соппы наварсат, тынщаң явалмисат, холам пус хуват наварсат. Ның нявремат па мет хорам сахлал па вайдал этгысат.

«Многоязычный голос Севера» харна нявремат

ораңна Ворна ими пушци нёхты хор щирна верам йис потар эттаса, мастер-классатна нэпек эвалт ворна хор эватсат. Щи томпына «В краю оленьих троп» вантапса верыдыса, щит 8 «Г» классна онтыды Кирилл Климов хансам хорат.

«Там ай кер тылац 30-мет хатлна Охсар ашкода-интернат нявремат хоца Белгород па Белгородской область па Донецкой народной республика эвалт онтыды нявремат майдата ёхтыдысат. Ентсат, ор хатна сай енщсат, кадаң яхат па ныңат охал хоцаңна хорлал версат. Интернатна, нявремат онтыды ныңатна емаң хатална версайт. Ювам нявремат, ханты па ор ях нэңхэт масаят вантсат, сахат, ваят, паркаят», – Анна Викторовна Боровикова лавас.

Лув кутдална Вячеслав Худи па Владислав Климов, дын интернат нявремат эвалт лапатхощёң талданна Ямал мув северной многоборье Сборной хоца лоңман оллаңан. Охал соппы наварты тахайна алаң тахайт вуйдысқан, районной, окружной па всероссийской касты харатна ар пус нох этыдысқан. Майдата ёхтам нявремат ораңна мастер-классат эттасқан, хоты охал соппы наварта, тынщаң воцкемита, юх талта масл.



Хор: Приуральский филиал «Ямал-потомкам!»

Вулэң па хул-вой велпаслаты ёх емаң хатлэл постасат



Югра мув юкан вулэт тайты куца ху С.А. Кечимов.



Вулэң ухдаң касопсайн нох питом ёх хоятат.

Хащам ятан Русскинской куртан Сорханл районан рут щирн мув тайты хантэт «Вулэң па хул-вой велпаслаты ёх емаң хатлэл» хорасаңа постасат. Тамащ уйтантопсайн вантсэв, хоты туңа-щира па ошаңа-щаңа улты ай унт куртан улапса щирдал лэщатты хантэт Туром ёхан хуватан лый кутэлн кассат.

Сорханл районаң арсыр куртан па вошат элты хоятат ёхтыдысат. Щи волаң вер ураңан ямкем ар мойң хатнэху Сорханл, Тюмень, Екатеринбург ун вошат элты там хорамаң емаң хатадн па усат.

Мет олаңан тый актащам хоятат елпийн Ас-угорской «Хатдые» нэмпи якты па потрат ванлтаты таха ай ёх ханты мир якат туңа-щира альсат. Лый юпелн па «Ёмвош ёх» арыты хотаң нэңат мир елпийн сыр-сыр ай па ун арат шеңк умща арысат.



Ху ёх катдасыдат.

Хор: Владимир Енов



Вулэң ёх кастыя лавласлат.

Кашң ай муй уншак хоята тата шеңк умащ ус дыед ванттыя па худанттыя.

Ияха актащам хоятат елпийн муң Югра мув округе вуды тащат тайты куца ху Степан Кечимов тамиты потарас:

– Там хатадн «Вулэң па хул-вой велпас ёх емаң хатлэв» 55-

мет пуш постаты питлуд. Щимащ волаң вер ураңан кашң ай па ун хоята ям ясңат ястадам, лудан нын иса вецкат номасн ат ёхатсайты, касты муй тынасты па щутщаты вердан туңа-щира, туса елды ат мантсат. Ванта, Сорханл районан ёхи хащам талатн ханты ёхлуд мет ун тайты вуды тащат



Ёх тынщаң сува ёвалсат.

энмалдат. Нын касапса юшдан иса пайдыя ат йидат. Ям емаң хатл нынана!

Алаңсахат вушат элты еңта дор хоща касапсайт мантыя питсат, и тухал нэңат па ху ёх касты вердал етшаптасат. Тухал ёх сора лохатн хухалсат, кимет отат тынщаң сува ёвалсат муй ухлат шоппи наварсат. Хащам ёх юращсат па катдасысат.

«Мув-ават па хатнэху» сыр-сыр унт войт, худ хорасат шавиты

А.П. Ядрошников нэмпи хот елпийн ханты ёхлуд тынасты хар версат. Щита вуды, кураң вой нёхи, арсыр ёхан худат муй унт вой сохат па вонщамотат ёша пайттыя кашң хоят верыгас.

Тамащ емаң хатлат Русскинской куртан Сорханл районан иса 1970-мет тал вуш элты вертыя питсайт. Мет ун па волаң касапса хантэт кутатн – щит, хун лый вулэйн кирам ухлатн каслат. Там пуш щи вер ураңан 40 хатнэху вулэт касты щира лэщатас. Щиңанща щи касты верн нох питам па олаңмет таха ёхтам хоятат «Бурани» нэмпи лонщхопан мойдасайт. Там пуш ищи щимащ мойлапса дыела мув илпи тащ каншты тахайт элты мийм нётапсайт онтасн куца ёхлал лэщатсат.

Там кутатн Сорханл район унт куртаң рут муватн аратэлн кат щёрас молтас хатнэху ул. Лый юкан вулэт тайлат, худ-вой велдат па вонщамотат акатлат.

Вулэң ухлатн касты нэңат кутн худмет тахая тата Алёна Вылла ёхтас, лув «Зубр» нэмпи унт юх эватты картыйн маса. Кимет таха Елена Ренгова вус, лув па хон пелак хоп сэвас моторн юкантса. Олаң тахая Нина Тэвлина питас, лув «Бурани» лонщхопан мойдаса.

Щалта ху ёх кутан худмет тахая Дмитрий Тэвлин ёхтас,

лув «Зубр» нэмпи унт юх эватты картыйн маса. Кимет таха Виталий Вылла вус, лув па хон пелак хоп сэвас моторн юкантса. Олаң тахая Денис Комтин питас, лув «Бурани» лонщхопан мойдаса.

Щиты Русскинской куртан Сорханл районан «Вулэң па худ-вой велпаслаты ёх емаң хатлэл» рут мув щирн улты хантэт сохнаптасат.

Владимир Енов ханшам потар

Хоты Мойпар мувна этас

(Ханты йис потар)

Карра порайна Мойпар торамна ос. Торам-ащел талаң хатлат лув торам вердал пилна халща яңхас. Мувна нәңхэт лайласлат, хой элты ерт масл ки, ерт китл. Халща кепа энамты ның мосаңни ки йил па нявремал ил хойлта ант веритл, Торам-ащи щиның яммалдалды, няврем па ил хоялалды. Хой кепа тут харл орна лап ант хоратл па талаң ор ясла, щин кутна нәңхэт хатат щин тут хоща питлат, нәңхэт хатлы хыщлат. Щит, Торам-ащи аса вантман тайдалды па атам нәңхэт хишты маслат. Торам-ащи ар ропата тайл.

Торам-ащи хол ки мантална, Мойпар йикиел ким этлита ант эсалсалды. Йи щимащ хатлна лув ащел ясаң ант холсалды, хойты тахайл эвалт ким этас, яңхал хат хощаңна, вантал, илан мув ныла, вурты нойна лаңкман ол, восты нойна лаңкман ол, нави нойна лаңкман ол. Ащел ёхатмална, лув вуратта питас:

– Аще, эслы манэм мувна, ма сәңк лытлам ошта, малай мув касаң порайна йилап нойна лаңкаман ол.

Ащел лавас: «Ат ол, эсаллэм ма наңен мувна, наң щита нәңхэт ораңна емаң вай олта питлан, топ номман тайи, нәңхэт сопас верлат – наң лув сопаслад ад есалдыла. Лытыт наңен отща сыта, ор наңхрат дыва, орна энамты рэхат дыва, нәңхэт ад палтаптыла».

Талла нәмпи мойпар мувна эсса. Щита юхат элты восты лыплат энамта питмел, пам востатл, щин порайна Талла мостасды, антам мувна нэмса ной, мувна ад Товы ёхтас. Лыта лытта питас, вантал, ёхан сыдна хул велты ях амаслат, юх даращдал хулна тәл оллайт. Мойпар нарыта питас, нәңхэт хощ палтамасат, хонтсат, худлад щита хыйсалдал. Мойпар даращатна олам худлат аса юхы дыслы.


Луң ёхтас, каврам, пилна, рэхат холна ант энамсат. Яңхас Мойпар, яңхас па калаңаң нәңхэт тащел пилна сыялас. Калаңаң нәңхэт вусды па хощ палтаптасды, калаң катлас, юхы дыслы. Итта Мойпар хощ корыта питас, хонл касы, ант мосталды мала хоты йис, вантладды, Савар-яйел йил. Халлад Мойпар,



Хоп: pinterest.com

Савар па лувел лавал: «Мойпар-яйем, наң ярэмасэн хоты наңен Торам-ащел лавас, нәңхэт ант палтаптыта, лув сопаслад ант есалдата. Щитна наң хощ корыта питсан». Савар манас.

Вантыйл Мойпар, лыплат хойта питсат, номасл, щит ма торам эвалт вантмем. Нэмса хойм лыпат хорпи ной антам, щит лыплат. Торам-ащи ным ватна щин поласта питас. Ищки ёхтас, ланщ питта питас, Талла па щин нәңхэт хоща манас. Вантладды, ныңат тут харна лытыт каварлат, путлад эвалт



Хоп: culture.ru

щимащ омащ эпал, палтаптасды ныңат, аса нәңхэт сопасат юхы дыслы. Мойпар па щин хощ корыта питас, нәхта тәлна ант веритал. Вантладды охсар ими йитал ныла.

Охсар ими лавал: «Ай яйем, Торам-ащина емаң вайи китсайн, наң па лув партам ясаң ярэмасэн.

Манас охсар-апыел, Талла амасл па номасл: «Хоты ма торамна ямас осам, сок ант вантсам, итта па мувна ёхатмем юпина топ лытыт кансты коссы олам. Холладды, хой кепа щин йитал щатл, щин эвалт щит Мув-амәл.

Мув-амәл лавал: «Талла, йикием, ма наң Мув-амән осам, наң Торам-ащелна емаң вайи олта китсайн, наң па ясаң ант холсан, аса парта версэн, щитна, торамна парта манта ант веритлан топ мув элты олапсэн ищи ям олта ант питл, тал хуват хойта питлан».

Щиты щин Мойпар мув хуват яңхал, кул оратна ханяыйл, топ нәңху сәмна ки питл, нәңхэтна мохты пасканы тәлна нәхалла, санс хуват юватла.

Вера Лонгортова ләщатсалды



Ханты улапса этаптаты хар

Ёмвошан «Торум Маа» каман улты этнографической музей хоса ханты па охаль улапса этаптада. Муй хорпи улты, пормасат шавиты хотат, пой-кащты хар, вой велты ёх тайты пормасат усат, иса вантты па худантты рахал.

«Торум Маа» харан ханты па охаль вантопсайт, емаң хатлат верлайт. Си тахайн Вячеслав Юрьевич Кондин рупитал. Уй-тантопсайт па проектат дэсятты кусяя ул.

Ма сита удмем порайн, Москва вош «Юн Арктика» проект хуват нох питам няврэмат тохи ликапсат. Ханты улапса альман, Вячеслав мойң хоятлад вой велпасдаты юш хуват тутдысды. Си хатл сита рупитты хоятат, ёхтыдыйм каматса группая, катра улты улапса элты потартсат па пормаслад этаптасат.

Там лопасан сита верам хорат вантаты па кум тайты порайн, тохи яңхаты.



Хор: Альбина Тырлина

Альбина Тырлина ханшам потар

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб.106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 0450

Подписные индексы:
на год – ПА700, на полугодие – ПР561

№ 14 (1265)

Газета вышла в свет 5 апреля 2025г.
Подписано в печать 3 апреля 2025г.
по графику: 16.00
фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д.9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб.106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д.39А

Генеральный

директор
АНО «Ямал-Медиа»
Зулинова
Марья Андреевна

Главный редактор
Яковлева
Аллина Кирилловна